



# Icyegeranyo cy'amakuru y'imikino yaranze icyumweru

2023

Taliki 20– 25 Ukwakira



P.1 Cycling : Hatangijwe gahunda yo gukundisha abana umukino wa "Mountain Bike"

## Ijambo ry'ibanze

Komite Olempike y'u Rwanda yashyizeho iki cyegeranyo mu rwego rwo kurushaho kumenyekanisha ibikorwa byayo n'iby'abanyamuryango bayo (Amashyirahamwe y'Imikino mu Rwanda) hagamijwe gukomeza guteza imbere siporo no kuyikundisha Abanyarwanda muri rusange by'umwihariko abakiri bato.

Iki cyegeranyo gikubiyemo amakuru n'ibikorwa bya siporo byaranze icyumweru, kikazajya gisohoka rimwe mu cyumweru.

Ntigitimbura kandi izindi nzira Komite Olempike y'u Rwanda isanzwe ikoresha mu kugeza amakuru ku banyamuryango bayo n'abanyarwanda muri rusange.

## Ibirimo

- P1 **Football** : U Rwanda rwasoreje ku mwanya wa gatanu muri "FC Bayern Youth Cup 2023"
- P1 **Cycling** : Hatangijwe gahunda yo gukundisha abana umukino wa "Mountain Bike"
- P2 **Kung Fu Wushu** : Ijonjora ry'umunsi wa kabiri wa shampiyona ryabereye i Muhanga
- P2 **NPC-Rwanda** : Hatangiye shampiyona y'imikino ngororamubiri
- P3 **Football** : Habaye imikino y'umunsi wa 8 wa shampiyona
- P3 **Kung-Fu Wushu** : Hasojwe amahugurwa y'iminsi 50

**1 Football : U Rwanda rwasoreje ku mwanya wa gatanu muri "FC Bayern Youth Cup 2023"**

Taliki 21 na 22 Ukwakira 2023 mu Budage habereye irushanwa rihuza amarerero y'umupira w'amaguru y'ikipe ya Bayern Munich mu batarengeje imyaka 16 "FC Bayern Youth Cup 2023" aho ikipe y'u Rwanda yasoreje ku mwanya wa 5.

Iri rushanwa ryari ryitabiriwe n'ibihugu 8 aho byari mu matsinda abiri, itsinda A, ryari rigizwe na Argentina, Mexico, Germany na India naho itsinda B rigizwe na South Africa, Rwanda, USA na Nigeria.

Mu mikino yo mu matsinda, iyi kipe y'u Rwanda yatsinze USA ibitego 3-1, inganya na Nigeria 0-0, itsindwa na Afurika y'Epfo igitego 1-0.

Mu mukino wo guhatanira umwanya wa gatanu, ikipe y'u Rwanda yatsinze u Budage kuri penaliti 3-1 nyuma yo kunganya 0-0.

Kapiteni w'ikipe y'u Rwanda, Ishimwe Elie na Ndayishimiye Barthazar babonetse mu bakinnyi beza b'iri rushanwa.

**Uko amakipe yakurikiranye**

Ikipe ya Nigeria ni yo yegukanye igikombe, ikurikirwa na South Africa (2), Argentina (3), Mexico (4), Rwanda (5), Germany (6), USA (7) na India (8).



**Cycling : Hatangijwe gahunda yo gukundisha abana umukino wa "Mountain Bike"**

Taliki 21 Ukwakira 2023, mu Karere ka Bugesera muri "Field of Dreams" i Ntarama hatangijwe gahunda yo gukundisha abakiri bato umukino wo gusiganwa ku magare mu misozi "Mountain Bike".

Iki gikorwa cyatangijwe ku bufatanye bwa Komite Olempike y'u Rwanda, ishyirahamwe ry'umukino w'amagare mu Rwanda "FERWACY" na Ambassade y'u Bufaransa mu Rwanda.

Abana 40 bari hagati y'imyaka 10 na 15 ni bo bitabiriye itangizwa ry'iyi gahunda.



## 2 Kung Fu Wushu : Ijonjora ry'umunsi wa kabiri wa shampiyona ryabereye i Muhanga

Taliki 22 Ukwakira 2023 mu Karere ka Muhanga habereye ijongora ry'umunsi wa gatatu muri shampiyona y'igihugu mu mukino njarugamba wa Kung Fu Wushu "Rwanda Kung Fu Wushu Championship 2023".

Iri jonjora ryabereye mu kigo cy'urubyiruko cya Muhanga ryahuje amakipe 5 yo mu Ntara y'Amajyepfo.

Nkuko bisanzwe abakinnyi bitabiriye bahatanye mu byiciro 2 birimo kwiyerekera "Taolu" ahakinnye abakinnyi 16 ndetse n'icyiciro cyo kurwana "Sanda" ahari abakinnyi 5. Abakinnyi bitabiriye bose bari 21.

Muri Taolu nta mukinnyi wabashije gukomeza kuko bagaragaje urwego ruri hasi naho Sanda hazamutse abakinnyi 4 akaba ari bo bazakina umunsi wa nyuma wa shampiyona.

Amajonjora y'umunsi wa 4 azakomereza mu Karere ka Nyagatare mu Ntara y'Uburasirazuba, taliki ya 29 Ukwakira 2023.



## NPC-Rwanda : Hatangiye shampiyona y'imikino ngororamubiri

Taliki 21 Ukwakira 2023 kuri Sitade Ngoma mu Karere ka Ngoma habereye umunsi wa mbere wa shampiyona y'imikino ngororamubiri y'abantu bafite ubumuga "Rwanda Athletics Championship 2023-2024".

Abakinnyi baturutse mu turere 8 ari two Ngoma, Rwamagana, Kayonza, Gatsibo, Nyagatare, Bugesera, Kirehe na Musanze bahatanye mu gusiganwa metero 100, 200, 400, 800 na 1500. Bahatanye kandi mu gutera umuhunda "Javelin", gutera ingasire "Discus" ndetse no gutera ibiremereye "Shot Put".

Nyuma rero y'iyi mikino, mu bagabo, Rwamagana yasoreje ku mwanya wa mbere n'amanota 96 ikurikirwa na Nyagatare (59), Kirehe (45), Kayonza (33), Ngoma (33), Musanze (24), Bugesera (08) na Gatsito (07).

Mu bagore, Musanze ni iya mbere n'amanota 34, ikurikiwe na Ngoma (12), Nyagatare (12), Rwamagana (10), Kayonza (07), Bugesera (06) na Gatsibo (01).

Imikino ya shampiyona y'umunsi wa kabiri izabera i Musanze, taliki 02 Ukuboza 2023.



## 3 Football : Habaye imikino y'umunsi wa 8 wa shampiyona

Taliki 20 kugeza 22 Ukwakira 2023 habaye imikino y'umunsi wa 8 wa shampiyona y'icyiciro cya mbere mu mupira w'amaguru mu bagabo. Imikino y'umunsi wa 9 biteganyijwe ko izaba taliki 27 kugeza 29 Ukwakira 2023.

### Uko imikino yagenze

#### Taliki 20-10-2023

- Police FC **3-1** Kiyovu

#### Taliki 21-10-2023

- Mukura **2-1** Bugesera FC
- Rayon Sports **3-0** Sunrise FC
- Muhazi United **1-1** Musanze FC
- Marines FC **0-1** Gasogi United

#### Taliki 22-10-2023

- Etoile de l'Est **0-0** AS Kigali
- Etincelles FC **0-3** APR FC
- Amagaju FC **0-1** Gorilla FC

### Urutonde rwa shampiyona 2023-2024

| Umwanya | Ikiye           | Imikino | Amanota |
|---------|-----------------|---------|---------|
| 1       | Musanze FC      | 8       | 17      |
| 2       | APR FC          | 7       | 17      |
| 3       | Police FC       | 7       | 13      |
| 4       | Amagaju FC      | 8       | 13      |
| 5       | Rayon Sports    | 7       | 12      |
| 6       | Mukura          | 8       | 12      |
| 7       | Kiyovu          | 8       | 12      |
| 8       | Gasogi United   | 8       | 11      |
| 9       | Gorilla FC      | 8       | 09      |
| 10      | AS Kigali       | 8       | 08      |
| 11      | Bugesera FC     | 8       | 08      |
| 12      | Etoile de l'Est | 8       | 07      |
| 13      | Muhazi United   | 8       | 07      |
| 14      | Etincelles FC   | 8       | 07      |
| 15      | Marines FC      | 8       | 06      |
| 16      | Sunrise FC      | 7       | 06      |



## Kung-Fu Wushu : Hasojwe amahugurwa y'iminsi 50

Kuva taliki 06 Nzeri kugeza 25 Ukwakira 2023, ishyirahamwe ry'umukino njarugamba wa Kung Fu Wushu mu Rwanda "RKWF" ku bufatanye n'Ambasade y'u Bushinwa mu Rwanda, Henan University of Technology binyuze muri "Henan Friendship Overseas Affairs service co., Ltd" habaye amahugurwa y'iminsi 50 yitabiriwe n'abakinnyi 52 baturutse mu makipe 25 yo mu gihugu hose.

Aya mahugurwa "Seminar on Shaolin Martial Arts and Taiji Boxing of Chen Style" yabereye mu nzu y'imikino ya Tsen Sport Kung-Fu Organization ku Kimihurura mu Rugando yari mu byiciro bibiri aho icyiciro cya mbere "Taiji Boxing of Chen Style" yakoreshejwe n'inzobere yaturutse mu Bushinwa, Chen Haijun naho icyiciro cya kabiri "Shaolin Martial Arts" akoreshwa na Zao Changan.

Perezida wa RKWF, Uwiragiye Marc yatangaje ko aya mahugurwa ari ubwa mbere yari abereye muri Afurika bakaba rero bishimira ko yabereye mu Rwanda.

Yakomeje avuga ko abitabiriye bungutse ubumenyi bw'inshi buzatuma bazamura urwego rwabo ku rwego mpuzamahanga.

Lin Hang wari uhagarariye Ambasade y'u Bushinwa mu Rwanda akaba yatangaje ko bishimira ubufatanye bafatanye na RKWF mu guteza imbere uyu mukino wa Kung Fu Wushu.

Yakomeje avuga ko amahugurwa nk'aya aba agamije kongerera ubumenyi abakinnyi kugira ngo bazavemo ibihangange nka Bruce Lee na Jackie Chan.

Ubusanzwe uyu mukino ukomoka mu Bushinwa, Lin Hang agaragaza ko abahuguwe ubu bagiye kuba ba Ambasaderi beza b'ubushuti n'umubano mwiza hagati y'ibihugu byombi, u Rwanda n'u Bushinwa.

Mu bandi bitabiriye umuhango wo gusozwa aya mahugurwa harimo, Umuyobozi Mukuru ushinze Siporo muri Minisiteri ya Siporo "MINISPORTS", Rwego Ngarambe, Umujyanama muri Komite Olempike y'u Rwanda, Butoyi Jean ndetse n'umuyobozi wungirije wa "Education and Training College", Zhangyi.





**RWANDA**  
Olympic rings logo



**commonwealth**  
**games**  
**RWANDA**

Website: [www.olympicrwanda.org](http://www.olympicrwanda.org)

[www.olympicrwanda.org/commonwealth](http://www.olympicrwanda.org/commonwealth)

Email: [cnosr@olympicrwanda.org](mailto:cnosr@olympicrwanda.org) |     @RwandaOlympic

Address: Remera–Hallmark Center Building KG 17 Ave